



QVÆSTIO MEDICA

CARDINALITIIS DISPUTATIONIBVS

MANE DISCVTIENDA

IN SCHOLIS MEDICORVM

DIE IOVIS XXVII. FEBRVARII.

M. IACOBO RENAULT, Doctore Medico,
Præfide.

*An Variolis, à fuso largiter sanguine, ægrè, minúsve erumpentibus,
Balneum?*

I.

QUAS illiterati vocant variolas, morbus est invisus, Hippocrati cognitus, veriùs omnigenorum morborum complexio, vel si vis papulis se prodens dira, communis, & contagiosa lues, pestis nonnunquam pedilequa, sapius prænuncia, pestis ipsamet altera. Id monstri in varias vertit se facies, lufurum, illufurumque variis modis. Interdum principio minax, & veluti cuncta latè vastaturum, ad serenitatem mutatur subito. Interdum præter indolem mirè benignum, statim atque caput extulit, condit. At plerumque effufis furoris habenis, quoscunque infulit, indignè rapit, aut iis æternas suæ rabiei notas inurit. Vtprimum intimis fubdita vifceribus flamma comprehendit exagitatque vifcosos succos, simul ofcitantem, nunc & brachia pendentem corripit capitis, gutturis, dorfi, lumborum dolor; infestant febris, raucedo, invitæ lachrymæ, animi defectio, nausea, vomitio; pungitur jactaturque corpus univerfum. Non hunc suæ figit nequitæ modum crudescens morbus: cùm enim luridus sanguis, feroxque bilis inquietis inæstuant, tument, exultantque

præcordiis, nec jam se capiunt: seu vomant flammæ globos, seu vapor flammeus volet ad arcem corporis, de sua sede dejecta mens errat, caput occupat veteris, diffunditur imis sensibus oblivio, contrahuntur artus, nunc pavore somnus aufertur, nunc toto proflatur pectore, resonant aures, prospectum eripiunt conglutinata pupulæ, prius decori & faciles oculi, nisi cœcantur, inertî stupore urgentur, aut ardent, igne & sanguine suffecti, ardent & genæ, patulæ nares collectum volvunt spiritum, sæpe & cruorem nigrum, os informe, & prætumida labra horrorem incutunt, interclusæ fauces, quam negant cibus viam, vix laxant elisæ voci, sputoque acerrimo. Non tot pluunt glandes è concussis ilicibus, quot partes omnes extimæ pustulis obsidentur flagrantibus, albis, virentibus, purpureis, nigris, extequentibus, sanie taboque fluentibus; tum velut admorso, signatas in cute aspera cicatrices, foveas, coloremque ferrugineum relicturis. Nec melior conditio interiorum partium, quibus infedit perniciës udi & furialis veneni. Hinc ille lumbis, hic coxâ debilis, pes isti altero brevior, hinc fetorem nigrum, tabes, sæda, cruenta alvi proluvis, immundus sudor, quique membris undique crescit Avernalis odor. Hoc flagello tanguntur pauperum, Regumque pueri, invicti juvenes, belli fulmina: tanguntur & sideribus pulciores virgines, quibus dilapsâ in cineres facie, sicque miserè deformatis, ut non cognoscas easdem esse, levis una mors sit, vita, superstitibus, gravis.

I I.

TANTÆ calamitatis nefariè in homines grassantis causa multorum torsit ac distraxit ingenia. Nonnulli ut putarentur sapere cælum, quod fecere nocens, vituperavère. Culpam alij transulère in impurissimas sanguinis menstrui reliquias: alij in contaminatum semen. Accusarunt aliqui neglectum numen: Plures sædum atque infelicem victum; & his adversari, lautiores epulas vitamque luxu ductam; cæteri solam supervacaneorum humorum copiam; quam præter jure in crimen vocaveris puliculam, lac alienum, nimiam feri copiam perfusum: Iusti adhuc aërem cæcâ putredine pessimè inquinatum: Is nempe seu plumbeus auster, seu iniquior spiravit aura; & cum annus est formosissimus, & ubi æstatis, autumnive æstu incanduit: imò & cum tristis hyems scelerato frigore angustos corporis aditus malignè clausit, labem invehit obsceni morbi, qui ut defæviat in omnis ætatis ac sexus homines, juvenesque cum senibus, parentes cum liberis metat: Potius tamen lactentes, nuperque depulsos ab ubere pusiones atque virgunculas: crudelius adultos, florescentes, vividos: crudelissimè annosos invadit. Sed & quò quisque est propior, ægroque servit fidelius; hoc citius venit in partem cladis, etiam in medentes, ni caveant, erumpat. An sanguinis communione devinctos, quàm cæteros atrocius affligit? Dignum Poëtâ commentum. At si papulis conspurcatum, si utrumque, aut alterutrum ejus parentem pestiferum luis venerat virus afflaverit, quæcunque adsunt ad salutem signa, vel ipsum vanâ spe laetabunt Medicum.

C V M valens sui que compos Natura secretum ab integro sordidissimum sanguinem strenuè eiecit in cutem papulis coopertam, dum absit febris, salva res erit, etiam si nullum ars illi sibi medicanti ferat auxilium. At ubi illam habet languor & æstus, nec sunt expeditæ semitæ, per quas indomitam atque obluçantem trudit illuviem, ne onere degravata penitus corruat, sublevanda: non auro, non lapidum, gemmarumque fragmentis, ex hisve concinnatis confectioibus, ex quibus plus est mali, nihil commodi; non venenato narcoticorum usu, non perperam vocatis hidroticis, febrem, ni adsit, adducturis, non futilibus remediis, quibus semihomines, qui famam venantur, obtusas animas ludificant: sed sanguine, non semel, & quidem sine mora, dum constabunt vires, fundendo, quò febris, bilique furenti compedes injiciantur, oppressusque nativus calor perfleret. Impingendæ & dulciculæ potiones, ubera teneris infantulorum labris immulgenda. Iuscula mali nunc medici, nunc arancij succo saporata grandioribus objicienda. Injicienda, etiam fusiore alvo enemata, quæ ardorem viscerum modificant, leniendoque blandè substringant. His omnibus si nihil proficitur, hæretque in alto corporis papularum parens sanies, ne propterea spes abeat, aut cesses. Fas & jura sinunt, ut quæ te ducit ratio, gressum intrepidus dirigas, animumque intendas in balneum, magnarum sæpe remedium ægritudinum.

I V.

B A L N E A S vel Natura, vel Ars temperat, sed ambarum longè dissimilis ratio. Naturales calidæ, siccæ, flagrantibus extis infensissimæ, quas succensi in sinu terræ sulphuris, bituminis, vitrioli, calcis vires hauserunt, nostris addunt corporibus. Contra arte ex aqua dulci & tepida paratarum summa utilitas est. Nostræ nimirum naturæ blanda & amica vis aquæ, dum intrò se dat, nihil non emollit, levat artus labore fessos, sitim squaloremque abolet, jacentem appetentiam excitat, laxat, recludit. conferta & in via cutis spiramenta, quibus patentibus humorum fuligines liberè elabuntur: quin ubi corporis penetralia penitus subiit, torridos, concretos, contumacesque succos quibus se permiscet, lenit, diluit, & ad exitum parat: ut cuiusvis ætatis ac sexus hominibus, sanis, caufariis, rabi proximis, febris vexatis, defunctis, necdum ex morbi longinquitate recreatis apprimè conferat, munda, lætaque reddat omnia. Hem quoties frequenti lavatione prope funerarium, nihil præter nervos & lutidam pellem gerentium membris grata vice rediit habilis vigor, venis sanguis, relapsus in genas decens color, vivaxque gratia, & notus in vultus honor? Dolendum nunc esse desertius tam salutare præsidium, sapientissimis olim Romanis rerum dominis familiare & jucundum vitæ, cibique quotidiani condimentum. An & eam ob rem veteres papulis morbillisque minùs tentati? Certè qui dextro tempore lavat, cavet ne sit unde illæ fiant; & ubi est, citò tutòque in cutem evocat,

NE Natura vel à sectâ sapius venâ seignor, sibi permolestam sanguinis colluviem in altis viscerum venarumque recessibus morantem propriâ vi excutere possit in cutem: ne hæc jam minimis papulis quasi punctis impressâ, illam accipiat universam, obstat lutulenti humoris indocilis coctionem pati maligna vis, atque à cruditate orta pigrities; obstat & peregrino calori comes siccitas, quæ corporis inanitates comprimit, ductus coangustat, hiantesque venas astringit. Vis istos nodos, istas salntis moras rumpere? Vis & febrem deducere? fac æger (dum sint integra viscera) semel, bis, tæve detur aqua tepenti, calorem igneum illico remissuræ, humoremque suffecturæ plurimum, quem ut descendentem biberint partes omnes, Natura in suas se colligens vires, non ampliùs recalcitrantem, sed evictam, tractabilem, facilem, ultróque quâ se monstrat iter, sequentem colluvionem per laxiores corporis vias, & per aperta cutis foramina, quasi per omnes corporis portas effunder. At in metu est ne in partem aliquam principem cæco impetu defiliat balneo soluta impuritas: illum tibi adimit ratio. Quid? peritiles alienosque succos si per æquè minuit temperatque venæ sectio, demulcet atque perfrigerat aqua; valis multi sanguinis profusione pulchrè depletis, quid illos concitabit, aut quò tandem evagabuntur? Viden ut quibus renem lacerat calculus, immanes cruciatus ciet colum, aut præclusa ardore vesica, rapto quadam temeritate balneo, repente carnifex dolor fugit è corpore nec perpurcato, nec nitente? Vt illo ipso pruritus, scabies, psora, ferè purgantibus furianta, delentur? Sed quem latet diu olim barbarorum infantes, vel adhuc à matre rubentes, ad flumina, quò obdurarentur, impunè delatos. Planè *κατὰ ἀκτὴν πόσις παρτολῶν* optimum est inventum, etiam ad eliciendas cunctantes papulas, cùm à veteribus sapienter imperatum, tùm nostra ætate, ubi res ipsa fert, feliciter usurpandum.

*Ergo Variolis, à fuso largiter sanguine, ægrè, minùsve
erumpentibus, Balneum.*

Proponebat Lutetiæ IO ANNES ROBERT, Parisinus,
A. R. S. H. MDCLXX.

PARISIIS,
Ex Typographiâ FRANCISCI MUGUET, Regis ac Illustriss.
Archiepiscopi Typographi.